



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

## 10. Kalenderwoche – ab 08. März 2009

# Wiedorma Frauendaach

Das is e gewissor Nachdeel von solsche Gedenkdaache - se komm jedes Jahr offs Neue! Jeds Jahr mussde dir was einfalln lassn! Wie Weihnachdn - da kannsde ja ooch nisch jedes Jahr dasselbe schenkn. Wobei es nadihrlich ooch Männor gähm soll, die krischn jedes Jahr e baar neue Soggn un een Schlibs. Abor das dud dann bei die bedroffnen Männor ehm nur sähr begrenzde Freide erzeuschn. Un zum Fraundaach isses ehm ooch e bißl einfalllos, wensde als Mann deinor Gudstn zum Fraundaach jeds Jahr... sach mor ma - e Blumenschdeggl schenkn dusd. Männordreu! Sozusachn ersadzweise. Womeeschlich...?

Guhd, zu solsche Gedenkdaache dud ooch immor was geheern, was jeds Jahr gleisch is - so gewisse Rieduale. Zu Weihnachdn isses Danneboom un Gänsebradn. Beim Fraundaach wars friehor Geschirr offwaschn un Weinbrandbohnen ohne Grusde. Also, daheeme. Dor wähsendlich Deel vom Fraundaach had ja off dor Arbeid schdaddgefunden. In de volkseischnen Bedriebe. Da gabs frieh een Blumschdrauß vom Scheff un een kollegialen Schmadz off de Bagge. Dann hamm sisch de Fraun an große Kaffeedafeln in dor Gandiene zusammgerodded, wo se dann algholische Gedränke, Auszeischnungen und eene Fesdrede vom Bedriebsdiregdor embfangn hamm. Auserwähldede männliche Golleeschn mussdn sisch anbudzn - mid Scherze odor Dederon-Kiddl - mussdn dann de weiblischn Golleeschinnen bedienen un sisch geeschn Ende dor Feiorlichkeidn von de zunähmend endhemmdn Damen ooch ma begrabschn lassn. Da durfdesde als Mann nisch zimborlich sein. Es war ja Fraundaach!

Off dor annorn Seide dud heidzudaache die Frache schdehn, ob dähr Fraundaach noch een Sinn machn dud? Es dud ja keene volkseischnen Bedrieb mähr gähm. Isch meene, warum solln nu ausnahmslos un ohne Unnorschiede alle Menschn geähd wern, bloß weil se off Grund eenor

körborlischn Benachteiligung als Frau geldn dun? Das is doch Gleichmacherei! Mor mißde doch eischendlich welsche ausguggn, die e bißl was Besondres geleised hamm, die ibormähsisch fleißisch warn odor sähr schweigsam... odor gebährfreidisch... odor dreu!

Warum solln ooch die geähd wern, die grade in eene Drinkorheilanschuld eingelieford wordn sinn? Odor die ihre Kinnor hamm vorhungorn lassn? Odor die ihre Männor rumschubsn dun un drangsaliern dun... un immor alles bessor wissn...? Nemmor ma meine Gudste hähr - also, ährlich, da find isch off de Schnelle keen rischdischn Grund, warum isch die diesjäh ährn soll? Wenn isch ma ehm jedzde nisch bloß ährn will, weilse biologisch zu de Frau geheern dud. Biologisch dud se ja ohne Zweifl zu de Frau geheern, meine Gudste, abor obse bschyschologisch... also, so vom Wähsn hähr ooch dazu geheerd? Naja, abor isch hab aus daggdische Grinde die Frache vorgessn un een Schdrauß Rosn gekoofd. Weil se ehm bei allor Gridiggwirdischkeed doch meine Gudste is! De eenzsche die isch hab. Un ob misch eene andre erdraachn däde...?

**Eduard Sachsenmeyer**